

組別: 廣東話學生組冠軍  
學校: 中華基督教會方潤華中學  
人數: 5 名  
劇本: 約拿書

### 第一幕

(人群聲)

同學: 咦, 王約拿, 小息喇喎... 做乜咁頹呀?

約拿: 唉, 唔頹就假喇, 本來每年呢個時候我都好開心, 因為可以喺平安夜同街上嘅人報佳音, 但係今年學校竟然揀左去女童院報佳音囉!

同學: 女童院? 我都想去見識吓喎!

約拿: 你見埋我嗰份啦, 呢班咁嘅衰人做咁多壞事, 我做咩要同佢報佳音呀! 唔同你講喇, 襯小息訓陣先。

同學: 哦! 好啦! 拜拜!

### 第二幕

(進入夢境聲)

上帝: 約拿, 約拿。

約拿: (打呵欠) 邊個叫我呀?

上帝: 係我, 我係上帝。

約拿: 吓? 上帝?

上帝: 約拿, 你而家即刻向尼尼微大城嘅人宣佈: 上帝將會審判佢哋, 因為佢哋拜假神、行邪術、作淫行, 真係罪大滔天, 你去警告佢哋, 如果佢哋再唔悔改, 再過四十日, 尼尼微就要滅亡。

(上帝消失聲)

約拿: 上帝... 上帝! 唉... 呢班罪大滔天嘅人, 俾我就由得佢哋死算啦!

### 第三幕

(街道聲) (腳步聲)

約拿: 唉! 邊度多人方便宣佈呢? 咦... 嗰度好多人喎, 過去睇下咩事先!

壞人: 埋嚟睇埋嚟揀喇喂! 喂, 靚仔我依啲神像好靈架! 有病醫病, 冇病強生健體, 就算死咗呀, 拜兩吓就可以起死回生, 老虎都打死幾隻呀。

約拿: 唔... 我諗我都喺唔要喇!

(腳步聲)

妓女: 喂! 靚仔, 過嚟過嚟!

約拿: 咪扯住我!

妓女: 等我介紹啲美女你識, 你睇吓佢哋, 個個鬼火咁靚, 我啲客試過之後個個都欲仙欲死架...

約拿: 縮手!

(腳步聲)

妓女：洗唔洗咁惡呀！

約拿：各位尼尼微嘅市民，請過嚟聽我講呀！

(人群叫聲)

(腳步聲)

約拿：上帝派我嚟話你哋聽，因為你哋所行嘅邪惡，再過四十天，尼尼微就要滅亡喇！但係上帝而家俾機會你哋悔改…(漸細聲)

#### 第四幕

(小孩大哭)(腳步聲)

媽媽：傻女，做咩事呀。

小孩：(哭著) 媽媽，我哋好耐冇食嘢喇，真係好肚餓呀！可唔可以偷食一塊餅乾呀？

媽媽：傻女，我知你個肚仔呢餓到咕嚕咕嚕咁叫，但係我咪同你講過囉！我哋係因為做錯事，為咗向上帝證明我哋真心悔改，我哋一粒餅碎都唔可以食，甚至一滴水都唔飲得，而且仲要著住依件麻布衫祈禱，或者上帝會改變主意，唔會罰懲我哋呢！就連尼尼微王都係咁做架。你乖，忍耐下！

上帝：睇到你哋真心悔改，好！我改變主意，唔再消滅尼尼微城！

#### 第五幕

(蟬鳴)

(腳步聲)

約拿：唉！真係唔抵得呀！尼尼微城呢班人，咁都救得返？好彩我走得快啫，如唔係見多佢哋一秒都想死呀！唔…點解城東呢度熱過尼尼微城咁多架！曬死人咩！咦…嗰度有啲竹喎，等我搭個棚，遮下陰先！

(過場音樂)

約拿：終於搭完喇！唉…搵啖水飲吓先！

(過場音樂)

約拿：唉…原來呢度啲水咁難飲架，晒咗我咁多時間！咦…我個棚上面無端端多咗棵嘢嘅？喺晒，遮住我實唔洗曬親啦！

(過場音樂)

(鼻鼾聲)

路人：兄弟兄弟，你有事咩嘍？

約拿：咩事呀？喂，好曬呀！我個棚上面嗰棵唔見咗嘅？

路人：你棚上面嗰棵嘢已經俾蟲咬蛀咗喇！

約拿：有冇搞錯呀！好好哋一棵嘢就咁俾蟲咬咗！

(上帝出現聲)

上帝：約拿，呢一棵嘢唔係你種，佢生長得快，死得都好快，但係你都咁愛惜佢，而尼尼微城十二萬人活喺靈性既黑暗裏面，你就咁想佢哋死，你認為自己咁諗啱唔啱呀？

約拿：唔…的確唔係好啱。

上帝：一個唔識得憐憫他人嘅人，其實一樣有錯，但係我都肯原諒你，點解你唔試吓去原諒一

啲唔值得原諒嘅人呢？

約拿：上帝，對唔住呀！原來我咁自私，我求你赦免我嘅罪咩，幫助我學習去寬恕人、接納人。

上帝：王約拿，你最終都明白我心意喇！

(上帝消失聲)

### 第六幕

同學：咦？王約拿，你竟然肯嚟女童院傳福音？

約拿：嗯…我呢幾日諗過喇，之前我睇唔起人，唔識接納人，但係神冇責怪過我，嘅然神可以寬恕我，我有理由唔可以寬恕其他人，所以我哋都應該由今日起，學習去接納一啲做錯事嘅人。

同學：明喇明喇，唔好咁長氣啦，不如練吓一陣唱嘅詩歌仲好啦！

(一同唱歌)(漸細聲)